

**KALAALLIT AIRPORTS A/S-
imut**

MALITTARISASSAT

Ingerlatseqatigiiffiup aqqa, sumiiffik angerlarsimaffia aamma siunertaa.

§ 1.

- 1.1. Ingerlatseqatigiiffik ateqarpoq KALAALLIT AIRPORTS A/S.
- 1.2. Ingerlatseqatigiiffik aamma suliaqarnernik
ingerlatsisinnaavoq saniatigut atit makkua ataanni

Nuuk lufthavn A/S (KALAALLIT AIRPORTS A/S)
Ilulissat lufthavn A/S (KALAALLIT AIRPORTS A/S) Qaqortoq
Lufthavn A/S (KALAALLIT AIRPORTS A/S)
Greenland International Airports Ltd (KALAALLIT AIRPORTS A/ S)
- 1.3. Ingerlatseqatigiiffiup angerlarsimaffigaa Kommuneqarfik Sermersooq.

§ 2.

- 2.1. Ingerlatseqatigiiffimmut siunertaavoq Nuummi, Ilulissani aamma Qaqortumi mittarfimmik sanaartornissaq, piginnittuunissaq ingerlatsinissarlu aammalu tamatumunnga assingusunik suliaqarnissaq.
- 2.2. Nuummi, Ilulissani aamma Qaqortumi mittarfiit ulluinnarni ingerlanneqarnerisa isumaginissaanut, ingerlatseqatigiiffik suliaqartuusussamik avataaneersumik sulilersitsissaaq.

Ingerlatseqatigiiffiup aningaasaatai aamma aktiaatai.

§ 3.

- 3.1. Ingerlatseqatigiiffiup aktiaatinit aningaasaatai kr. 200.000.000-inik amerlassuseqarput, kr . 1.000-ikkaani taannalu amerlisaataatillugu aktiaatini agguagaasunik.
- 3.2. Aktiaatini ateq allassimassaaq aammalu ingerlatseqatigiiffiup aktiaatinut allattuiffiani allanneqassalluni.
- 3.3. aktiaatit arlaannaanniluunniit immikkut pisinnaatitaaffeqartoqanngilaq. Aktiaatillit arlaannaalluunniit ingerlatseqatigiiffimmut allanulluunniit aktiaatiminik tamakkiisumik ilaannaasumilluunniit akilersitsinissamut pisussaaffeqanngillat.
- 3.4. Aktiaatit tammaaneqartut inatsisini pappiaqqanut aningaasanik kaaviiartitsiviususnaanngitsunut maleruagassat sukkulluunniit atuuttut malillugit eqqartuussinertaqanngitsumik atuukkunnaarsinneqarsinnaapput.

Ataatsimeersuarnerit

§ 4.

- 4.1. Ingerlatseqatigiiffimmi ataatsimeersuarnerit sumiiffimmi angerlarsimaffigisami ingerlanneqassapput.
- 4.2. Nalinginnaasumik ataatsimeersuarneq, ukiumoortumik nalunaarutip kukkunersiorikkap akuerisaasullu kingusinnerpaamik Inuussutissarsiornermut aqutsisoqarfimmit tiguneqareersimasinnaaneraniit qaammatit 5-it aammalu ukiup naatsorsuusiorfiusup naanerata kingorna sapaatit akunnerisa 3-it qaangiunneranni, piffissaqartitsiviulluartumik ukiut tamaasa ingerlanneqassaaq
- 4.3. Ataatsimeersuarnissamut siulersuisut, aktiaatillit najugaannut aktiaatilinnut allattuiffimmi allassimasunut allagaqarlutik, annerpaamik sapaatit akunnerinik sisamanik minnerpaamillu ullunik 8-inik ilimasaaralutik, aggersaassapput. Aggersaanermi allassimassaaq, susassaqarfiit suut ataatsimeersuarnermi suliarineqassanersut, aammalu malittarisassanut allanguutissatut siunnersuut ataatsimeersuarnermi suliarineqassappat, siunnersuutip imarisai pingaarnerit aggersaanermi allanneqassapput.
- 4.4. Ullormut oqaluuserisassat aamma siunnersuutit tamakkiisut, kingusinnerpaamik ataatsimeersuarnissaq ullunik arfineq pingasunik sioqqullugu, ingerlatseqatigiiffiup qullersaqarfiani aktiaatilinnit misissorneqartussanngorlugit, saqqummiunneqassapput. Nalinginnaasumik

ataatsimeersuarnermut tunngatillugu, ukiumoortumik nalunaarut kukkunersiuusup atsiugaa, kingusinnerpaamik ataatsimeersuarnissaq ullunik 30-inik sioqqullugu, aktiaatilinnut nassiunneqassaaq aammalu kingusinnerpaamik ataatsimeersuarnissaq sioqqullugu ingerlatseqatigiiffiup qullersaqarfiani aktiaatilinnit misissorneqartussanngorlugu saqqummiunneqassalluni.

- 4.5. Aktiaatilik kinaluunniit, qulequtaq ataatsimeersuarnimi ullormut oqaluuserisassani ilanngunneqarsinnaalluni piffissaqartitsiviulluartumik, tamanna pillugu siulersuisunut allaganngorlugu saqqummiussiguni, ataatsimeersuarnermi qulequttamik ataatsimik suliarinnitsitsinissamut pisinnaatitaavoq.
- 4.6. Siulersuisut, kukkunersuiisoq imaluunniit ataatsimeersuarnermi tamanna naleqqussorineqarpat, immikkut ittumik ataatsimeersuarneq ingerlanneqassaaq. Qulequtaq aalajangersimasooq taallugu suliarineqarnissaa, aktiaatilinnit aktiaatinit aningaasaatit 1/10-annik piginnittunit allaganngorlugu piumasarineqarpat, immikkut ittumik ataatsimeersuarnissamut ullut 14-it iluanni aggersaasoqassaaq.

§ 5.

- 5.1 Nalinginnaasumik ataatsimeersuarnermi ukiumoortumik nalunaarut kukkunersioriigaq saqqummiunneqassaaq aammalu makkua ingerlanneqassallutik:
- a) Ingerlatseqatigiiffiup suliaqarnera pillugu nalunaarut.
 - b) Ukiumoortumik nalunaarutip akuerineqartussanngorlugu saqqummiunneqarnera.
 - c) Ukiumoortumik nalunaarut akuerineqartoq naapertorlugu sinneqartoorutit atorineqarnissaat imaluunniit amigartoorutit matussuserneqarnissaat pillugu aalajangerneq.
 - d) Siulersuisunut ilaasortanik qinersineq, ilanngullugu siulersuisunut siulittaasumik qinersineq.
 - e) Siulersuisuni siulittaasup aammalu siulersuisuni ilaasortat sinnerisa aningaasarsiaasaannik aalajangersaaneq.
 - f) Kukkunersuiusumik toqqaaneq

§ 6.

- 6.1. Aqutsisup siulersuisunit toqqagaasup ataatsimeersuarnermi isumaqatiginninniarnert aqussavai aammalu suliat suliarineqarneranni periaatsit,

taasinerit inernerilu pillugit apeqqutini tamaginni aalajangiissalluni.

§ 7.

- 7.1. Aktiaatit ataasiakkaat tamarmik kr. 1.000-inik aningaasartallit taasisinnaatitaatsipput.
- 7.2. Siunnersuutit ullormut oqaluuserisassani ilanngunneqarsimasut kisimik ataatsimeersuarnermi aalajangiiffigineqarsinnaapput.
- 7.3. Susassaqarfiit ataatsimeersuarnermi suliarineqartut, aktiaatileqatigiiffinnut inatsimmi sinniisoqarneq aamma amerlanerussuteqarneq pillugu immikkut maleruagassanik aalajangersaasoqarsimanngippat, amerlanerussuteqartut taasinerisigut aalajangiiffigineqassapput.
- 7.4. Ataatsimeersuarnermi pisut ingerlatseqatigiiffiup isumaqatiginninniarnernut allattuiffianni ilanngunneqassapput, taannalu aqutsisumit atsiorneqassaaq.

Siulersuisut aamma pisortat.

§ 8.

- 8.1. Ingerlatseqatigiiffiup siulersuisui 5 – 7-inik ilaasortaqaassapput, ataatsimeersuarnermi qinerneqartunik.
- 8.2. Siulersuisunut inuit suliaminnut pikkorissuseqartut, mittarfinnik imaluunniit attaveqaatinik taamaaqataannik sanaartornermut, ingerlatsinermut aningaasalersuinernullu naleqquttunik piginnaaneqartut aammalu misilittagaqartut, qinerneqassapput. Ingerlatseqatigiiffiup siulersuisui ataatsimoorlutik nalinginnaasumik inuussutissarsiornikkut aqutsinikkullu piginnaasaqassapput kiisalu mittarfimmik ingerlatsinerup iluani aqutsinermut piginnaasaqassallutik kiisalu timmisartumik assartuussinermut allatullu timmisartumik angallannermut paasisimasaqassallutik.
- 8.3. Siulersuisunut ilaasortat ataatsimeersuarnermi qinigaasut ukiumut ataatsimut qinerneqartassapput. qinigaaqqittoqarsinnaavoq
- 8.4. Siulersuisuni ilaasorta q piffissap atuuffiusussap naanissaa sioqqullugu ilaasortaajunnaarpat, tamatumalu malitsigisaanik siulersuisuni ilaasortaq nutaaq qinerneqarpat, siulersuisuni ilaasortaq nutaaq taanna ilaasortaajunnaartup piffissaq qinigaaffiata sinnerani, ilaasortaassaaq.

- 8.5. Ataatsimeersuarnermi siulersuisuni ilaasortat akornanni siulittaasumik qinersisoqassaaq. Siulersuisut akunnerminni siulittaasup tullianik, siulittaasup peqannginnerani, maleruagassat siulersuisut suleriaasissaanni erseqqinnerusumik aalajangersarneqartut malillugit siulittaasutut atuuttussamik, qinersissapput.
- 8.6. Siulersuisunut ilaasortat ukiumoortumik aningaasarsiaqartinneqassapput, ukiunut aggersunut annertussusissaa ataatsimeersuarnermi aalajangersarneqartassalluni.
- 8.7. Inuk namminersortutut imaluunniit atorfeqartutut niuernikkut atassuteqarnini pissutigalugu, ingerlatseqatigiiffimmut akerliusinnaasunik soqutigisaqartutut ilimagineqartariaqartoq imaluunniit oqartussani taaneqartuni peqataanerani ingerlatseqatigiiffik pilliutigalugu iluaqutissartaasunik pineqartunik pissarsisinnaasutut ilimagineqartariaqartoq, siulersuisunut qinerneqarsinnaangilaq imaluunniit siulersuisuniiginnarsinnaanani.
- 8.8. Inuk Inatsisartunut imaluunniit Naalakkersuisunut ilaasortaaguni imaluunniit ilaasortanngoruni, imaluunniit akiliisinnaajunnaartutut imaluunniit akiliisarnerninik unitsitsisutut nalunaarutigineqaruni, akileraartarnermut inatsisinik annertunerusumik unioqquitsinermut imaluunniit Kalaallit Nunaanni pinerluttulerinermut inatsimmi imaluunniit Danmarkimi imaluunniit nunani allani inatsisini taamaaqataanni aningaasanik pinerluttuliorneq pillugu aalajangersakkanik unioqquitsinermut eqqartuunneqaruni, siulersuisunut qinerneqarsinnaangilaq imaluunniit siulersuisuniiginnarsinnaanani.
- 8.9. Siulersuisunut ilaasorta qinaluunniit ataatsimeersuarnermi qinerneqarnissaq sioqqullugu naalagaaffimmi maani ingerlatseqatigiiffinni allani aqutsinermik suliaqarnini pillugu paasissutissiissaaq, tassani ilaanatik ingerlatseqatigiiffiit immikkoortorta qarfiusut 100%-imik pigineqartut.
- 8.10. Namminersorlutik Oqartussat siulersuisunut taaseqataasinnaanatik peqataasartussanik 2-inik toqqaasinnaapput. Taaseqataasinnaanatik peqataasartussat ingerlatseqatigiiffimmi siulersuisut ataatsimiinneranni aamma ataatsimeersuarnermi oqaaseqarsinnaatitaallutik peqataasinnaapput aammalu ingerlatseqatigiiffimmut tunngasut, taaseqataasinnaanatik peqataasussaat Namminersorlutik Oqartussat soqutigisaasa isumaginissaannut pisariaqartutut isigisaat, pillugit paasissutissanik tamaginnik pissarsisinnaassallutik. Taaseqataasinnaanatik peqataasussat siulersuisuni ataatsimiinnernut aggersarneqartassapput aammalu maleruagassat siulersuisuni ilaasortanut atuuttut malillugit najoqqutassat ataatsimiinnermi atugassat tigusassallugit.

§ 9.

- 9.1. Susassaqarfiit siulersuisuni suliarineqartut, amerlanerussuteqartut taasinerisigut aalajangerneqassapput. Allatigut siulersuisut siulersuisutut sulinerat pillugu suleriaasissami erseqqinnerusumik aalajangersakkat malillugit aalajangiisassapput.
- 9.2. Siulersuisut ataatsimiinnerini pisut ingerlatseqatigiiffiup isumaqatiginninniarnernut allattuiffianni nalunaarutitut allanneqassapput, siulersuisunut ilaasortat tamarmik atsiortassallugit.
- 9.3. Siulersuisut pisortanik atorfinitsitsissapput.
- 9.4. Siulersuisunut ilaasortat, pissutsit siulersuisunit imaluunniit inatsisit malillugit ingerlaannaq tamanut saqqummiunneqartussatut aalajangigaasimangippata, sunut tamanut siulersuisunut ilaasortaanerminni paasisaminnut tunngatillugu nipangiussisimasussaataapput.

Atsiorsinnaatitaanermut maleruagassaq

§ 10.

- 10.1. Ingerlatseqatigiiffik pisortamit siulersuisunut siulitaasoq peqatigalugu, imaluunniit siulersuisunut ilaasortamit siulersuisunut ilaasortaq ataaseq imaluunniit siulersuisut ataatsimoortut peqatigalugit, atsiortinneqartassaaq.

Naatsorsuutit aamma kukkunerisiisarneq


§ 11.

- 11.1. Ingerlatseqatigiiffiup ukioq naatsorsuusiorfia tassaavoq qaammatsiutit malillugit ukioq. Taamaattoq qaammatsiutit malillugit ukioq siulleq tassaavoq pilersitsiviusumit 2017-ip naanissaata tungaanut.
- 11.2. Ingerlatseqatigiiffiup naatsorsuutaasa kukkunerisiorneqarnerat, kukkunerisiuisumit naalagaaffimmit akuerisaasumit, ukiut tamaasa nalinginnaasumik ataatsimeersuarnermi toqqagaasumit ataatsimit imaluunniit marlunnit, ingerlanneqassaaq.

*****★*****

Taamaalilluni ingerlatseqatigiiffiup pilersitsilluni ataatsimeersuarnerani, ulloq 1. juli 2016 akuerineqarpoq aammalu ulloq 3. marts 2017 immikkut ittumik ataatsimeersuarnermi allanngortinneqarluni.

aqutsisutut


Poul Knudsen
Advokat (L)
Hans Egedesvej 3
Postboks 1046 - 3900 Nuuk
Tlf. 32 34 00 - Fax 32 38 68
Eqqartuussissuserisoq Poul Knudsen